

Poštovani predsjedniče Skupštine TK, dopredsjednici Skupštine, poslanici, prisutni gosti i predstavnici medija.

Sve vas srdačno pozdravljam!

Danas, ovdje, pred poslanicima, pred našim građanima, prvo što želim reći jeste da premijersku funkciju prihvatam kao čast i kao jednu vrstu patriotske obaveze. Danas naš pogled mora biti upućen prvenstveno prema budućnosti i odgovorima na izazove koji nas očekuju. Izazovi sa kojima se moramo suočiti su stvarni, ozbiljni i brojni. Zahvalan sam vam naukazanom povjerenju i želim da svi prihvatimo nadu i polako potisnemo strah. Danas je vrijeme u kojem trebamo i želimo kreirati ljepšu budućnost. Tuzlanski kanton nije zaslužio da bude sinonim sivila. Ovo je kanton koji svojim građanima nudi prirodne resurse, kanton koji uz rad, trud i zalaganje svih nas može obezbijediti svima nama pristojan život. Moramo početi raditi i što odgovornije u ovu zemlju ulagati svoja znanja, umijeća, svoj trud i, više od svega, svoje poštenje.

Vlada, koju ovdje danas predstavljam, je dobila povjerenje preko 100.000 birača i uživa snažnu podršku ove Skupštine. Ovo je Vlada koja će slušati i glas pozicije i opozicije. Pred nama jeste teško vrijeme u kojem moramo da ispravljamo greške prethodnih vlada i pokažemo narodu odlučnost, hrabrost i posvećenost u sprovođenju bolnih, ali spasonosnih reformi.

Ljudi su izgubili povjerenje u sve i svakoga. Svjestan sam činjenice da danas šta god učinili, koliko god se trudili, koliko god se borili, koliko god postizali rezultate, postoji ogromna sumnja u dobre namjere, a nerijetko i netrpeljivost. Ne moramo u svemu da se slažemo, ali to ne smije da se odražava na naše strateške ciljeve.

Ljudima treba govoriti istinu, ma koliko ona bila bolna i neprijatna. Istinu ćemo govoriti o teškoj finansijskoj situaciji u kojoj se naš kanton nalazi, ali i istinu o općenito teškom stanju u društvu u kojem živimo. Naša obaveza također je da narodu kažemo istinu o tome ko je kriv što su određeni resursi Tuzlanskog kantona dati u ruke određenih ljudi, koji su prodavali interese Tuzlanskog kantona i njegovih građana za svoje lične interese, ne vraćajući Tuzlanskom kantonu ono što mu pripada.

Mi znamo da nema ispunjenja naših ciljeva bez promjena u društvu, privredi, ali isto tako i bez promjena mentaliteta kod ljudi, njihovog ponašanja, radnih navika, tolerancije i shvatanja u kako teškim vremenima svi živimo. Želio bih da u ljudima zaživi nada i vjera kako još uvijek postoje i oni koji i drugima, a ne samo sebi, žele dobro. Jedan od najvećih preduslova za napredak jeste da dakle promijenimo naš način razmišljanja.

Reforme, poštenje, štednja i rad bit će ključne riječi u radu ovog saziva Vlade. Svjestan sam da će biti mnogo onih koji će od početka rada nove Vlade nastaviti da govore protiv reformi. Spreman sam da prihvatim na sebe sav teret težine reformi, jer uvjeren sam da ukoliko ne

provedemo reforme u oblasti privrede, javnih finansija, zdravstva, obrazovanja, javne administracije, posljedice nepromijenjenog stanja biti će zastrašujuće po naš kanton.

Znam da neće biti lako. Mnogi će se protiviti, protestovati ispred ove dežurne zgrade Vlade, i ko zna gdje sve. Mi predstavljamo vlast i mnogi će u nama vidjeti dežurne krivce za sve, za loše privatizacije, za loše poslovanje njihovih firmi i općenito teško stanje u kojem se svi zajedno nalazimo.

Da bismo uspjeli u našim reformama, moramo dobro da pogledamo kakav je Tuzlanski kanton danas, a onda da pričamo kakvog ga želimo u narednom periodu.

Nezaposlenost, siromaštvo i fiskalni deficit su problemi koji svakodnevno opterećuju Tuzlanski kanton. Problemi u zdravstvu sve više direktno utiču na kvalitet zdravstvene zaštite naših građana. Javna administracija je glomazna, skupa i izrazito neefikasna. Isto važi i za najveći broj preduzeća u državnom vlasništvu. U mnogim oblastima bitnim za ekonomski rast, zakonska regulativa je nedosljedna, komplikovana i nelogična. Veliki infrastrukturni projekti se realizuju sporo, dok se paralelno neodgovorno ugovaraju novi projekti koji podjednako tapkaju u mjestu.

Ovako sažeto i bez ulaska u detaljnije analize i razloge za sve navedeno, jasno je koliko je situacija ozbiljna.

Neophodna je potpuna profesionalizacija upravljanja javnim preduzećima i Javnim Ustanovama TK-a, i eliminisanje gubitaka u tim preduzećima i ustanovama. Javna preduzeća ne mogu više biti mjesta socijalnog zbrinjavanja, ona moraju postati profitabilna i dio profita, dobiti, vraćati osnivaču, odnosno Vladi TK.

Tuzlanski kanton ima 15.000 ljudi koji rade u javnom sektoru. Mnogi od njih rade pošten posao – poput nastavnika, medicinskih sestara, ljekara, policajaca... Ali još mnogo njih dobija platu koju ne zarade.

Restrukturiranje državnih preduzeća podrazumijeva ili prodaju strateškom investitoru, ili njihovu transformaciju, ili njihov prestanak rada u skladu sa važećim zakonima ili donošenjem novih zakona koji bi omogućili što bezbolniji način rješavanja statusa tih privrednih društava. Dat ćemo sve od sebe kako bismo ostvarili prve dvije opcije, ali, ukoliko ne uspijemo, neće biti izbora nego da se ide na treću opciju.

Prvi radni zadatak Vlade biće snažna fiskalna konsolidacija u cilju obezbjeđenja preduslova za održivost javnih finansija.

Reforme će imati za cilj rješavanje problema opšte finansijske nediscipline i stvaranje okvira za uspostavljanje pravičnosti u sistemu zarada i zapošljavanja u javnom sektoru, što su bitni preduslovi za srednjoročnu održivost javnih finansija i privredni rast.

Da bi fiskalna konsolidacija, dala efekte, neophodno je sa njenom primjenom početi što prije i uz podršku Skupštine TK. Imajući u vidu da fiskalna konsolidacija može biti iskazana i kroz Dokument okvirnog budžeta TK za period 2015-2017. godina a koji još nije donesen, Vlada Tuzlanskog kantona ovaj dokument iskoristit će kao prvi pokazatelj zainteresiranosti za smanjenje javne potrošnje. Borba protiv sive ekonomije takođe će predstavljati okosnicu u radu nove Vlade Tuzlanskog kantona putem mehanizama koji stoje kantonima na raspolaganju i zajedničkim učešćem u ovim aktivnostima sa organima viših nivoa vlasti. Sva najstojanja nove Vlade na uspostavi fiskalne konsolidacije svoj rezultat trebaju dati uštedama na rashodovnoj strani Budžeta Tuzlanskog kantona za 2015. godinu, ne ugrožavajući obavljanje ustavnih nadležnosti kantona.

Racionalna potrošnja i raspodjela javnih prihoda dobila je novi mehanizam kontrole putem Zakona o budžetima u Federaciji BiH, koji se primjenjuje i na kantone a podrazumjeva uspostavu budžetske inspekcije u Ministarstvu finansija i potpisivanje izjave o fiskalnoj odgovornosti svakog rukovodioca kod budžetskog korisnika.

Nastojat ću, u saradnji sa drugim kantonima i kantonalnim skupštinama, pokrenuti aktivnosti na revidiranju mehanizma povrata vanjskog duga i nastaviti aktivnosti na inicijativi vezanu uz izmjenu Zakona o pripadnosti javnih prihoda na način da se omogući pravednije raspoređivanje javnih prihoda.

U prvoj fazi konsolidacije izvršit će se:

- Analiza plata i drugih novčanih primanja u javnom sektoru i donošenje Zakona o platama u javnom sektoru TK,
- Mjere štednje u javnim ustanovama, preduzećima i organima uprave,
- Odlučna borba protiv sive ekonomije biti će definitivno jedan od prioriteta nove Vlade. Ovo je zadatak koji će zahtijevati značajan angažman Uprave za inspeksijske poslove, uz napomenu da su glavni oblici borbe protiv sive ekonomije u nadležnosti federalnih organa.

Pored fiskalne konsolidacije Vlada će raditi i na drugim, jednako bitnim elementima ekonomske politike. Jedan od bitnih elemenata je i promjena zakonskog okvira koji definiše uslove poslovanja u Tuzlanskom kantonu.

Cilj nam je zajedno sa Privrednom komorom TK, Udruženjima privrednika TK svih privrednih grana, napraviti analizu zakonske regulative za koju je nadležan Tuzlanski kanton i kroz zajedničko djelovanje predložiti izmjene i dopune zakona koje će pomoći stvaranju povoljnijeg privrednog ambijenta i rasterećenju privrede. Također, u saradnji sa navedenim institucijama planiramo napraviti analizu Federalnih propisa, te prema Federalnoj Vladi i Parlamentu pokrenuti potrebne inicijative za izmjenu Federalnih propisa.

Važno je napomenuti da svaka izmjena propisa na području Tuzlanskog kantona, a o kojima odlučuje Skupština Tuzlanskog kantona i kojima se umanjuju prihodi općina, mora imati pozitivno mišljenje Saveza udruženja gradova i općina u FBiH u skladu sa Zakonom o lokalnoj samoupravi, te je potrebna i aktivna uloga i podrška općina sa područja TK.

Oblast pravosuđa i uprave

Prioriteti u ovoj oblasti su:

- donošenje Zakona o državnoj službi Tuzlanskog kantona,
- donošenje Zakona o platama i drugim primanjima zaposlenih u javnom sektoru kantona (Vlada, Skupština, javna preduzeća, javne ustanove i dr.)
- osiguranje, u skladu sa mogućnostima, što boljih materijalnih i svih drugih pretpostavki za što učinkovitiji rad pravosudnih organa,
- praćenje rada organa uprave i upravnih organizacija Kantona, a u cilju, prije svega, racionalizacije i efikasnijeg rada istih.
- ubrzati vođenje stečajnih postupaka i inicirati izmjene zakona o stečaju, izmjene kojim bi se ograničio rok trajanja za vođenje stečajnih postupaka i kojim bi se promijenili naplatni redovi, tako da radnik bude u prvom naplatnom redu umjesto povjerilaca.

Vlada TK će osigurati sredstva za neometano funkcionisanje svih pravosudnih organa uz maksimalno poštivanje instituta neovisnosti pravosudnih organa kako bi se omogućilo njihovo funkcionisanje u skladu sa evropskim standardima.

Javna uprava će biti servis svim građanima, te ćemo u narednom periodu puno više pažnje posveti obuci uposlenika kao i uklanjanju administrativnih prepreka koje se tiču otvaranja i registracije privrednih subjekata.

Oblast industrije, energetike i rudarstva

Tuzlanski kanton je industrijski kanton, ali je ta industrija na koljenima. Proizvodni i industrijski kapaciteti u našem kantonu nisu u mogućnosti da se sami razvijaju i djeluju u skladu sa sve većim zahtjevima savremenog tržišta.

Ovdje ne treba zanemariti činjenicu da se veliki broj tih subjekata nalazi u teškom stanju sa nagomilanim dugovima i neizmirenim obavezama prema radnicima, pa će ova Vlada biti spremna da izvrši analizu svih privrednih društava sa većinskim državnim kapitalom i državnim kapitalom u kojima postoje nagomilani dugovi i obračunate, a neizmirene obaveze po raznim

osnovama i da u skladu s tim, zajedno sa Vladom Federacije, pokuša iznaći potrebna rješenja. Zakon o finansijskoj konsolidaciji privrednih društava je poslednja prilika koja se treba dati privrednim društvima, koja se nalaze u teškom stanju da se pokušaju konsolidirati u skladu sa odobrenim programima finansijske konsolidacije.

Vlada TK u prvoj godini mandata planira, nakon gore navedene analize poduzeti aktivnosti zajedno u saradnji sa federalnim organima na, zaustavljanju negativnih trendova u privredi Tuzlanskog kantona, kao pretpostavku da se u drugoj godini mandata planira održavanje tog trenda. Time bi se u trećoj i četvrtoj godini trebali pokazati rezultati laganog rasta privredne proizvodnje i smanjenja nezaposlenosti.

Poznata nam je i činjenica da je jako veliki broj radnika stekao uslove za penzionisanje, ali zbog neizmirenih obaveza po osnovu obaveznih doprinosa (PIO, doprinosi za zdravstveno osiguranje i doprinosi za osiguranje od nezaposlenosti), te bivšeg poreza na plaću, a sada poreza na dohodak, ne mogu ostvariti svoja prava na penzionisanje ili prijavu kod Službe za zapošljavanje. Pokušat ćemo, zajedno sa Skupštinom TK-a i Vladom Federacije BiH, da inicijativom za donošenje odgovarajućeg Zakona riješimo ovaj problem, kako sam prethodno naveo.

Ponovo želim istaći jednu važnu činjenicu, a to je da je oblast radnog zakonodavstva i oblast uređenja obračuna i uplate obaveznih doprinosa i poreza iz i na plaću u isključivoj ustavnoj nadležnosti Federacije BiH.

Važno je napomenuti da se u preduzećima sa državnim i većinskim državnim vlasništvom sva imovina vodi kao vlasništvo Federacije BiH, a da Vlade kantona upravljaju tom imovinom u preduzećima na čijem kantonalnom području se nalaze, te je, logično da Federalna vlada mora biti uključena u rješavanje ovog problema putem donošenja novih zakona ili izmjene postojećih.

Zaposlenike privrednih društava čiji se status rješava smatram partnerima, te očekujem zajedničko angažovanje na rješavanju ovih pitanja.

Naš Kanton raspolaže sa prirodnim izvorima čvrstog fosilnog goriva koji predstavljaju osnovu za proizvodnju toplotne i električne energije. Svakako da je za svaku pohvalu projekat izgradnje cementare, ali i termoelektrane u Banovićima, kao i projekat izgradnje Bloka 7 TE Tuzla. Ova Vlada će u narednom periodu pružiti svu neophodnu pomoć kako bi se ovakvi i slični projekti realizovali. Sigurni smo da će se na području Tuzlanskog kantona investicija od oko 2 milijarde KM pozitivno osjetiti i da samo ovakvi kapitalni projekti mogu nas izvući iz krize u kojoj se nalazimo. Stoga oni koji su protiv ovakvih ili sličnih projekata nisu dobronamjerni. Očekujem da će značaj ovakvih i sličnih projekata biti prepoznat od Federalnog nivoa vlasti i da će se Tuzlanskom kantonu koji je centar industrije, energetike i rudarstva, konkretnim aktivnostima dati značajna podrška. Svi građani, sve političke partije, posebno one koje imaju svoje zastupnike na višim nivoima vlasti (Federalni i državni parlament) moraju snažno i jedinstveno podržati i istrajati na dvije ideje koje će iz temelja promijeniti situaciju u TK u oblasti

privrede, a to je izmjena Zakona o pripadnosti javnih prihoda na nivou Federacije (ne može građanin bilo kog kantona vrijediti dva puta više od građanina TK), ekonomska autonomija TK koja podrazumijeva da TK mora upravljati svojim prirodnim resursima i energijom. TK je kičma elektro-energetskog stuba, ne samo u Federacije, nego i u BiH. Stoga je potrebno obezbijediti pravičnu raspodjelu dobiti u elektroenergetskom sektoru gdje će TK biti, kao kanton koji proizvodi najviše energije, na prvom mjestu. Centralizacija energetskog sektora projektom koncerna elektroprivrede pokazala se kao neuspješna, zbog čega TK, pogotovo Tuzla i rudnici Kreka trpe ogromne štete koje se ogledaju u smanjenju proizvodnje, smanjenju dobiti i smanjenju broja zaposlenih. U rudnicima Kreka izgubljeno je oko 1000 direktnih radnih mjesta i još najmanje toliko indirektnih radnih mjesta, u posljednje četiri godine od formiranja koncerna Elektroprivreda i rudnici.

Zato nam je valjda svima jasno kuda vode nove najave centralizacije u ovom sektoru, a to nećemo dopustiti.

Oblast poljoprivrede, šumarstva i vodoprivrede

Poljoprivredna djelatnost, odnosno proizvodnja zdrave hrane, predstavlja budućnost ne samo našeg kantona već i daleko šire i sigurno je jedan od značajnijih resursa u razvoju kantona.

Ova Vlada će sigurno favorizovati poljoprivrednu proizvodnju, jer baš u njoj vidimo jednu od šansi za razvoj Tuzlanskog kantona i nova upošljavanja, kroz primarnu proizvodnju hrane, pri čemu prvenstveno mislim na proizvodnju zdrave hrane, u stočarstvu, ratarstvu, voćarstvu, peradarstvu.

Planiramo pružiti podršku općini Čelić za pokretanje Fabrike za preradu voća i povrća u Čeliću, kroz davanje fabrike u zakup, ili na neki drugi način, u cilju pokretanje procesa novog upošljavanja i otkupa poljoprivrednih proizvoda. Ako bude neophodno, zajedno sa Općinom Čelić dati garancije za sigurnost na ulaganja domaćeg brendiranog investitora u okviru zakonskih mogućnosti za izdavanja garancija od strane Kantona.

Planiramo pokrenuti proces okrupnjavanja poljoprivredne proizvodnje, odnosno stvarati nosioce poljoprivrednog razvoja, dok ćemo podršku dati i malim gazdinstvima koja će biti značajna podrška poljoprivrednoj proizvodnji u Tuzlanskom kantonu.

Mnogo poljoprivrednih proizvoda propada kod proizvođača jer ga nemaju gdje distribuirati. Iz tog razloga potrebno je raditi i na uspostavi centra na nivou kantona koji bi otkupljivao te viškove hrane. U tom dijelu očekujem značajnu podršku od domaćih trgovinskih lanaca i grupacija.

Drvoprerađivačka industrija na Tuzlanskom kantonu ima višegodišnju tradiciju i jedna je od najstarijih industrijskih grana. Ekološki je prihvatljiva, ima i izvozni potencijal sa preko 70 %

i privredna je grana koja konstantno bilježi suficit. Domaća drvoprerađivačka industrija mora biti prioritet u snabdijevanju drvnom sirovinom.

Zbog nedonošenja pravne regulative nije uspostavljen funkcionalan sektor šumarstva koji bi osigurao efikasno i efektivno gospodarenje šumskim resursima, adekvatan nadzor i čuvanje šuma, kao i postojanje institucija neophodnih za osiguranje održivog gospodarenja šumskim resursima. Mi moramo odmah započeti sa aktivnostima kako bi se stanje u ovoj oblasti učinilo funkcionalnijim. Procesi koji predstoje moraju se provoditi zajedno sa svim zainteresiranim stranama, a posebnu pažnju treba obratiti na interese jedinica lokalne samouprave, pri tome poštujući Ustav Tuzlanskog kantona i Ustav Federacije BiH, a sve u cilju adekvatne zaštite ovog resursa i stvaranju boljih uslova za razvoj drvoprerađivačke industrije i dobrobiti svih ljudi koji žive na području Tuzlanskog kantona.

Kada je u pitanju vodoprivreda, prioritet u radu Vlade će biti vodosnabdijevanje kao i zaštita izvorišta i vodenih akumulacija.

Pitka voda je sve veći globalni problem, ali sa sigurnošću možemo kazati da Tuzlanski kanton raspolaže sa velikom količinom izvorišta pitke vode, što u narednom periodu predstavlja veliki potencijal za Tuzlanski kanton.

Oblast boračko - invalidske zaštite

Kada su u pitanju boračke populacije lično ću insistirati da se u potpunosti primjeni Zakon o dopunskim pravima boračkih populacija TK-a.

I sam dolazim iz te kategorije, te smatram da ova kategorija stanovništva zaslužuje posebnu pažnju.

Ova Vlada će pokušati obezbijediti povoljne programe za zapošljavanje osoba koje pripadaju ovoj kategoriji, a intenzivno ćemo osigurati sredstva za stipendiranje djece pripadnika boračke populacije i nastaviti sa stambenim zbrinjavanjem boračkih populacija u okviru raspoloživih budžetskih sredstava.

Oblast unutrašnjih poslova

Jedan od prioriteta u radu Vlade bit će stvaranje uslova za poboljšanje sigurnosne situacije na području Tuzlanskog kantona. Sigurnosni sektor Bosne i Hercegovine je podijeljen i rascjepkan. U bližoj prošlosti svjedoci smo koliko je neefikasna organizacija policije, stoga je potrebno opremiti, kadrovski ojačati i povećati broj izvršilaca u operativnom dijelu policije Tuzlanskog kantona. Također, hitno je potrebno riješiti pitanje invalida rada u MUP-u TK, s

obzirom da navedeni problem opterećuje i onemogućava djelovanje punog kapaciteta operativnog sastava policije.

Posebnu pažnju posvetit ćemo jednoj o važnijih djelatnosti MUP-a, o kojoj se do sada malo govorilo, a to je rješavanje pitanja građanskih stanja, jedne od najvažnijih djelatnosti u svakoj državi u koju spada izdavanje ličnih dokumenata, registracija vozila itd. Moramo stvoriti uslove da bi se ovi poslovi vratili u prostore koji su u vlasništvu MUP-a TK, tamo gdje postoje uvjeti, a čime će se smanjiti izdvajanja za zakup poslovnih prostora. Zbog istih razloga Vlada će pokušati iznaći načina i mogućnosti da ministarstva Vlade koncentriše na jednom mjestu, čime ćemo napraviti značajne uštede.

Apsolutno ćemo raditi na tome da se Uprava policije na čelu sa policijskim komesarom dodatno opremi, učini operativnijom i oslobodi svih vrsta političkog pritiska i uticaja.

MUP TK-a ostat će opredijeljen u borbi protiv svih vidova kriminaliteta sa posebnim akcentom na borbu protiv narkomanije.

Svjesni smo činjenice da je korupcija jedna od najvećih problema tranzicijskog društva kao što je Bosna i Hercegovina. Direktni je uzročnik mnogih negativnih trendova kao što su pad stranih investicija, pad proizvodnje, zaposlenosti. Inisistirat ćemo na borbi protiv korupcije i kriminala u skladu sa državnim strategijom za borbu protiv korupcije koju je donijelo Vijeće ministara BiH.

U tome ću tražiti maksimalan angažman svih institucija u prvom redu od inspeksijskih organa, policije i tužilaštva.

Oblast turizma i saobraćaja

Kada je u pitanju turistička ponuda Tuzlanskog kantona prioritet će biti promocija kulturno –historijskih spomenika, te unapređenje i razvoj turizma, kadrovska jačanje ovog ministarstva kroz odsjek za turizam u okviru ministarstva.

Putna mreža našeg kantona je prilično loša, dotrajala i nedovoljna kako za potrebe građana tako i za potrebe naše privrede, zbog čega najveću odgovornost za ovakvo stanje putne infrastrukture snosi JU Ceste TK, odnosno danas JU Direkcija regionalnih cesta TK i JP Ceste FbiH, koje potrebama građana i privrede TK, kada je u pitanju kvalitetnija putna infrastruktura, nisu mogle na kvalitetan način odgovoriti zbog jako prisutnog uticaja u prethodnom periodu interesnih grupa u ovoj oblasti. Taj uticaj će biti eliminisan u daljem radu JU. Jedan od prvih zadataka u ovoj oblasti je i analiza poslovanja JU Direkcija regionalnih cesta TK i nakon toga Vlada će se odrediti na osnovu utvrđenog stanja.

Izgradnja brze ceste za Orašje mora biti prioritet svih vlada, kantonalnih vlada (Orašje i TK) i Vlade Federacije. Vlada Federacije mora ubrzati rekonstrukciju putnog pravca Tuzla-Sarajevo. Značajnu podršku na infrastrukturnim projektima od lokalnog i kantonalnog značaja očekujemo i od Federalnog nivoa vlasti.

Potrebno je uložiti i velike napore na jačanju kapaciteta Međunarodnog aerodroma Tuzla, kako bi u potpunosti mogao odgovoriti zahtjevima tržišta u pogledu pouzdanosti i bezbjednosti transporta putnika i roba u čemu vidim i jednu od šansi za privredni razvoj kantona. Za ovaj prijekat će nam biti potrebna pomoć i drugih nivoa vlasti.

Oblast obrazovanja

Mladi su najznačajniji resurs Tuzlanskog kantona, a obrazovanje je faktor koji može omogućiti da u budućnosti taj resurs doprinese prosperitetu Tuzlanskog kantona.

S tim u vezi Vlada Tuzlanskog kantona posebnu pažnju će posvetiti stvaranju uslova za kvalitetno obrazovanje i zapošljavanje mladih.

Izvršit će se detaljna analiza stanja u obrazovanju koja treba obuhvatiti analizu upisne politike, broja učenika, studenata, broja zaposlenih, analiza pedagoških standarda, analiza vrste smjerova i profila koji se školuju, šta je opravdano, šta je potreba tržišta, uvođenje moratorija na neke studijske odsjeke, sagledati potrebe eventualno otvaranja novih odsjeka na Univerzitetu kao što je npr. odsjek turizma.

U sektoru obrazovanja mora se eliminisati politički uticaj. Škole se moraju depolitizirati. Direktore škola moraju birati roditelji učenika, a ne političke partije. Na taj način dobit ćemo svakako na kvalitetu obrazovanja kao i zdravijoj atmosferi unutar obrazovnih institucija.

Okvirni Zakon o visokom obrazovanju mora biti implementiran u potpunosti i Univerzitet u Tuzli mora imati nezavisnost u svom radu pri čemu treba težiti ka standardizaciji nastave uvažavajući principe Bolonjske deklaracije kao i jačanje kadrovskih potencijala Univerziteta u Tuzli.

Posebna zadaća je afirmacija obrazovanja romske populacije na našem kantonu.

Oblast zdravstva

Jedan od najvećih izazova u narednom periodu za Vladu biće očuvanje dostignutog nivoa zdravstvene zaštite (primarna, sekundarna i tercijarna) te iznalaženje dodatnih i održivih izvora

finansiranja zdravstvenog sektora. To bi trebalo rezultirati jačanjem dostupnosti zdravstvene zaštite za sve građane Kantona.

S tim u vezi Vlada će, kada je u pitanju oblast zdravstva, biti fokusirana na sljedećim aktivnostima:

- izmjena esencijalne liste,
- uvođenje trezorskog načina poslovanja u zdravstvenom sektoru,
- kontrola javnih nabavki u zdravstvenom sektoru i ukidanje tzv.ekskluzivnih prava kod javnih nabavki u zdravstvenom sektoru,
- izjednačavanje novčanih primanja u zdravstvenom sektoru(DZ,UKC itd.),
- povećanje stepena komercijalizacije zdravstvenih usluga na UKC- tercijarni nivo zdravstvene zaštite,

Centralizacijom domova zdravlja TK, će se izjednačiti status i standard svih domova zdravlja na prostoru TK i uvesti veća finansijska disciplina, što će nam otvoriti prostor za upošljavanje svih ljekara sa prostora TK-a koji se nalaze na zavodima za zapošljavanje.

Mnogo je sredstava i napora uloženo na planu stručnog usavršavanja kadrova i nabavke medicinske opreme. Cilj Vlade će u daljnjem periodu biti stvaranje boljeg ambijenta za rad uposlenika u zdravstvu, kako bi se smanjio i spriječio odliv kvalitetnih kadrova.

Fokus rada Vlade će biti i stabilizacija sadašnjeg stanja na UKC-u zbog teškog finansijskog stanja u kome se nalazi (obaveze prema dobavljačima, kredit za Plavu bolnicu), ali se istovremeno ne smije zapostaviti rad na modernizaciji i unapređenju bolničkih kapaciteta i bolničkog sektora. I pored teških uslova u kojima je UKC poslovao u 2014 god. rezultati rada UKC Tuzla u 2014. god. ohrabruju i pokazuju da imamo kadrove koji znaju i mogu napraviti iskorak u ovoj oblasti.

Važno je napomenuti da zdravstvo, kao ni obrazovanje, nije besplatno već ga građani plaćaju kroz razne vrste poreza i doprinosa, te iz tog razloga novac koji imamo za zdravstvo moramo da trošimo racionalno i ekonomično.

Oblast rada, socijalne politike i povratka

Oblast socijalne politike je najveći pokazatelj stanja u kojem se građani i društvo nalaze.

Adekvatne i konkretne aktivnosti u ovoj oblasti dokazuju spremnost institucija da se suoče sa najtežim problemima sa kojima se suočavaju najugroženije kategorije stanovništva.

Vlada će nastojati da obezbijedi preduslove kako bi u sistem socijalne zaštite uključila sve one mjere i programe kojima će zaštititi ugrožene grupe, odnosno pojedince. To su grupe koje su pogođene strukturalnim razlozima, krizama ili životnim teškoćama, a svoje potrebe nisu u mogućnosti da zadovolje radom i pravima koji iz rada proizilaze.

Borbom protiv zloupotrebe korištenja prava iz oblasti socijalne zaštite, ukidanjem dvostrukih korisnika socijalne pomoći (jednokratne novčane pomoći i stalne) unaprijedit će sistem socijalne zaštite na našem kantonu i doprinijet će da socijalna politika u našem kantonu u punom kapacitetu ispuni svoje obaveze.

Vlada će biti pokretač i zagovornik zajedničkog djelovanja nadležnih kantonalnih institucija u efikasnijem rješavanju pitanja zdravstvenog osiguranja za osobe koje ispunjavaju uvjete za mirovinu i osobe koje su u postupku ocjene radne sposobnosti.

Vlada će nastaviti na svaki način podržavati povratak izbjeglih i raseljenih i to s ciljem suštinskog okončanja toga procesa, onako kako je to predviđeno u Revidiranoj strategiji BiH za provedbu Aneksa VII Daytonskog mirovnog sporazuma. Opređeljenje će biti na održivom povratku, što će značiti, u suradnji s nižim i višim razinama vlasti, veću brigu za infrastrukturu u povratničkim naseljima te brigu za posao i jednaku mogućnost za povratnike.

Oblast prostornog uređenja i zaštite okoline

Prioriteti u ovoj oblasti su izmjene zakona o planiranju i izgradnji, smanjenje broja institucija koje su uključene u proces izdavanja, skraćivanje rokova u kome institucije moraju da se izjasne i otklanjanje ostalih uskih grla i uvođenje kancelarije za brze odgovore, što će sasjeći birokratiju i korupciju koji karakterišu građevinski sektor. Cilj nam je da skratimo vrijeme izdavanja građevinskih dozvola, uvedemo više reda u prostorno- planskoj dokumentaciji, uz insistiranje na primjeni propisa iz oblasti planiranja prostora, pokrenemo postupak izmjene prostornog plana u cilju podrške eventualnim investitorima, kao i da nastavimo provoditi i pružati pomoć ekološki prihvatljivim projektima energetske efikasnosti. Vlada kantona će dati punu podršku u radu JU Zaštićeni pejzaž Konjuh, dok je posebnu pažnju potrebno posvetiti jezeru Modrac, kao jednom od značajnih resursa pitke vode.

Kada je u pitanju okoliš, radit ćemo na smanjenju zagađenosti našeg kantona kroz edukativne projekte razvijanja kulture i svijesti koji će se sprovoditi putem škola i nevladinog sektora.

Neophodno je hitno uvođenje i sprovođenje evropskih standarda iz oblasti zaštite okoliša.

Oblast razvoja i poduzetništva

Izrada strategije razvoja TK je jedan od osnovnih prioriteta iz oblasti razvoja i poduzetništva.

Puna podrška će se dati projektima poticaja malih i srednjih preduzeća i obrtima, subvencioniranje kamata na kredite za obrtnike, projektima za zapošljavanje mladih. Naš veliki zadatak biće da razvijamo naš privatni sektor. Dugoročno, želimo da privatni sektor u ovom kantonu učinimo privlačnijim za rad od javnog sektora.

Vlada će raditi na promociji poduzetništva i jačanju inovativnosti i tehnološkog razvoja u malim i srednjim preduzećima.

Vlada će biti partner Privrednoj komori TK i Udruženju privrednika. Uvažavamo njihova iskustva, te stoga od njih očekujemo partnerstvo i inicijative koje će biti pokretačka snaga našeg kantona.

Također, siguran sam da će se vrlo brzo kreirati prepoznatljivi poduzetnički ambijent u Tuzlanskom kantonu koji će doprinijeti razvoju malih i srednjih preduzeća i obrta što je preduslov za otvaranje novih radnih mjesta.

OSTALO

Jedan od ciljeva ove Vlade bit će i uravnotežen razvoj cijelog kantona bez favoriziranja određenih sredina, posebno imajući u vidu činjenicu da sve općine nemaju svoje predstavnike u zakonodavnoj i izvršnoj vlasti.

Nedavne elementarne nepogode, koje nisu zaobišle ni naš kanton, pokazale su da sistem Civilne zaštite nije adekvatno odgovorio ona nastalu situaciju elementarne nepogode, te je stoga neophodno reorganizovati sistem CZ u TK i učiniti ga efikasnijim, a sve u cilju spašavanja i zaštite ljudi i njihove imovine.

Prioritetno ćemo riješiti imenovanja rukovodilaca u oblastima na čijem se čelu trenutno nalaze vršioci dužnosti funkcija, jer sam mišljenja da će rješavanje statusa rukovodilaca kroz konačna imenovanja doprinijeti njihovom kvalitetnijem radu, a sve ostale rukovodioce u javnim ustanovama i javnim preduzećim čiji je osnivač Vlada i Skupština TK, te članove Upravnih odbora pozivam da stave na raspolaganje Vladi svoje mandate. Vlada će nakon analize njihovih rezultata rada donijeti odluku o njihovom statusu.

ZAKLJUČAK

Dozvolite da vam predstavim ministre u novoj Vladi

1.) Kandidat za ministra finansija

Jakub Suljkanović, dipl.ekonomista;

2.) Kandidat za ministra industrije, energetike i rudarstva

Srđan Mićanović, dipl.ing.tehnologije;

3.) Kandidat za ministra obrazovanja, nauke, kulture i sporta

Mirsada Begović, prof. biologije

4.) Kandidat za ministra poljoprivrede, šumarstva i vodoprivrede

Abdulah Zukić, dipl.ekonomista;

5.) Kandidat za ministra unutrašnjih poslova

Alen Gadžo, prof.tjelesnog odgoja i sporta;

6.) Kandidat za ministra zdravstva

Elvis Bektić, doktor medicinske;

7.) Kandidat za ministra za rad i socijalnu politiku

Admir Huskanović, prof.geografije;

8.) Kandidat za ministra za boračka pitanja

Fahrudin Skopljak, dipl.ekonomista;

9.) Kandidat za ministra za razvoj i poduzetništvo

Mirela Đaković, mr. farmaceutskih znanosti iz oblasti bromatologije i nutricionizma;

10.) Kandidat za ministra trgovine, turizma i saobraćaja

Edin Ajanović, mr. ekonomije;

11.) Kandidat za ministra prostornog uređenja i zaštite okolice

Hasan Fehratović, dipl.ing.elektrotehnike;

12.) Kandidat za ministra pravosuđa i uprave

Jovan Stojanović, mr.prava.

Budući ministri, danas vam je data privilegija i obaveza. Služiti državi BiH,TK i njegovim građanima na tako visokom položaju jeste privilegija koju mali broj ljudi u životu dobije.

Uz privilegiju dolazi i odgovornost. Sigurno ste shvatili šta se od vas očekuje i koliko će to biti teško.

Svi vi ćete biti pod ogromnim pritiskom. Nećemo uspjeti u ovoj misiji, ako svako od nas bude radio sam. Nećemo uspjeti ako ne budemo snažno stajali zajedno.

Dezorganizacija našeg kantona svoje korijene imala je i u radu prethodnih Vlada, gde je bilo uobičajeno da svaki ministar radi posebno i autonomno. Neki ministri su smatrali da im ministarstva pripadaju, da su njihovo vlasništvo. Pretpostavljam da shvatate da takva praksa u radu ove Vlade neće biti prihvaćena i da će u ovoj Vladi stvari funkcionisati drugačije i nemojte nikada zaboraviti vi ste ministri svih građana TK,ne samo političkih partija koje su Vas predložile i za svoj rad odgovarate Premijeru, Skupštini TK-a i svim građanima TK-a.

U skladu s tim, budite sigurni da se neću dvoumiti da predložim smjenu bilo kojeg ministra koji ne budu izvršavali svoje zadaće u najboljem interesu građana TK.

Siguran sam da Tuzlanski kanton ima šansu. U ovom periodu koji je pred nama Tuzlanski kanton će imati svog značajnog predstavnika u izvršnoj vlasti Federacije BiH, premijera Fadila Novalića. Očekujem da nas on neće zaboraviti, već da će i u interesu BiH, u interesu FBiH i u interesu Tuzlanskog kantona, učiniti sve da značajna sredstva i projekti dođu u Tuzlanski kanton i da Tuzlanski kanton bude privredna lokomotiva Bosne i Hercegovine.

Za ovaj Plan i Program koji sam danas izložio očekujem i potrebna mi je podrška svih, pozicije i opozicije, vladinog i nevladinog sektora, medija, kao i šire društvene zajednice, a prije svih građana TK.

Hvala na pažnji !